

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкурентијски савјет

Zaključak

**o odbacivanju zajedničke Prijave koncentracije privrednih subjekata United Media S.à.r.l.
Luksemburg i Grand Slam Group d.o.o. Beograd**

Sarajevo
septembar, 2014. godine



Broj: 04-26-1-11-14-II/14
Sarajevo, 25.9.2014. godine

Na osnovu člana 25. stav (1) tačka e), člana 42. stav (2), a u vezi sa čl. 12 i 14. Zakona o konkurenciji («Službeni glasnik BiH», br. 48/05, 76/07 i 80/09), a rješavajući po zajedničkoj Prijavi koncentracije privrednih subjekata United Media S.à.r.l., 16-18, rue du Strasbourg, L - 2560 Luksemburg, Veliko Vojvodstvo Luksemburg i Grand Slam Group d.o.o., Danila Lekića 31, 11 000 Beograd, Republika Srbija, podnesenoj putem advokata Nihada Sijerčića, Trg djece Sarajeva 1., 71 000 Sarajevo, zaprimljenoj dana 12.5.2014. godine pod brojem: 04-26-1-11-II/14, Konkurencijsko vijeće Bosne i Hercegovine, na 96. (devedesetšestoj) sjednici održanoj dana 25.9.2014. godine, je donijelo

Z A K L J U Č A K

1. Odbacuje se zajednička Prijava koncentracije privrednih subjekata United Media S.à.r.l., 16-18, rue du Strasbourg, L - 2560 Luksemburg, Veliko Vojvodstvo Luksemburg i Grand Slam Group d.o.o., Danila Lekića 31, 11 000 Beograd, Republika Srbija radi neispunjavanja uslova za prijavu, u smislu člana 14. stav (1) Zakona o konkurenciji.
2. Ovaj Zaključak bit će objavljen u «Službenom glasniku BiH», službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće Bosne i Hercegovine (u daljem tekstu: Konkurencijsko vijeće) je, dana 12.5.2014. godine pod brojem: 04-26-1-11-II/14, zaprimilo zajedničku Prijavu koncentracije (u daljem tekstu: Prijava) privrednih subjekata United Media S.à.r.l., 16-18, rue du Strasbourg, L - 2560 Luksemburg, Veliko Vojvodstvo Luksemburg i Grand Slam Group d.o.o., Danila Lekića 31, 11 000 Beograd, Republika Srbija (u daljem tekstu: United Media i Grand Slam Group ili Podnosioci prijave), koje zastupa advokat Nihad Sijerčić, Trg djece Sarajeva 1., 71 000 Sarajevo, kojom privredni subjekt United Media namjerava steći kontrolu kupovinom (..) ¹% vlasničkih udjela nad privrednim subjektom Grand Production d.o.o., Danila Lekića 31, 11 000 Beograd, Republika Srbija (u daljem tekstu: Grand Production).

Podnosioci prijave su dana 13.5.2014.godine podneskom broj: 04-26-1-11-1-II/14 i dana 16.5.2014. godine podneskom broj: 04-26-1-11-2-II/14 dostavili dopunu Prijave.

Konkurencijsko vijeće je nakon uvida u dostavljenu Prijavu utvrdilo da ista nije kompletna i uredna, u smislu člana 30. stav (1) Zakona o konkurenciji (u daljem tekstu: Zakon) i čl. 9. i 11. Odluke o načinu podnošenja prijave i kriterijima za ocjenu koncentracija privrednih subjekata

¹ (..)- Podaci predstavljaju poslovnu tajnu

(«Službeni glasnik BiH», broj 34/10), te je zatražilo dopunu aktom broj: 04-26-1-11-3-II/14 dana 28.5.2014. godine na koji su Podnosioci prijave podneskom broj: 04-26-1-11-4-II/14 dana 4.6.2014. godine zatražili produženje roka za dostavu tražene dokumentacije. Konkurencijsko vijeće je zahtjev ocijenilo opravdanim te je dana 5.6.2014. godine odobrilo dodatno produženje roka aktom broj: 04-26-1-11-5-II/14. Aktima broj: 04-26-1-11-7-II/14 dana 7.7.2014. godine i broj: 04-26-1-11-9-II/14 dana 22.7.2014. godine Konkurencijsko vijeće je uputilo dodatne zahtjeve za dopunom Prijave i dokumentacije dostavljene uz Prijavu.

Podnosioci prijave su predmetnu Prijavu dopunili podneskom broj: 04-26-1-11-6-II/14 dana 13.6.2014. godine, podneskom broj: 04-26-1-11-8-II/14 dana 10.7.2014. godine, podneskom broj: 04-26-1-11-10-II/14 dana 30.7.2014. godine, kao i podneskom broj: 04-26-1-11-11-II/14 dana 5.8.2014. godine.

Nakon kompletiranja Prijave, Konkurencijsko vijeće je dana 25.9.2014. godine (akt broj: 04-26-1-11-12-II/14) Podnosiocima prijave izdalo Potvrdu o prijemu kompletne i uredne Prijave, u smislu člana 30. stav (3) Zakona.

Također, Podnosioci prijave su naveli, u smislu člana 30. stav (2) Zakona, da je prijava koncentracije podnesena tijelima za zaštitu konkurencije Republike Crne Gore, Republike Makedonije i Republike Srbije te da su isti predmetnu koncentraciju odobrili.

Konkurencijsko vijeće iz Prijave navodi slijedeće činjenice:

Prijava koncentracije je podnesena u smislu člana 16. stav (2) Zakona.

1. Učesnici predmetne koncentracije

Učesnici predmetne koncentracije su privredni subjekti United Media S.à.r.l., 16-18, rue du Strasbourg, L - 2560 Luksemburg, Veliko Vojvodstvo Luksemburg i Grand Production d.o.o., Danila Lekića 31, 11 000 Beograd, Repubika Srbija.

1.1. Privredni subjekt United Media - Podnosilac prijave

Privredni subjekt United Media S.à.r.l., 16-18, rue du Strasbourg, L - 2560 Luksemburg, registrovan je u Luksemburgu pod brojem B 184939 dana 5.3.2014. godine, i u vlasništvu je privrednog subjekta Slovenia Broadband S.a.r.l. 5, rue Guillaume Kroll, L – 1882, Luksemburg, a koji je pod kontrolom privrednog subjekta Kohlberg Kravis Roberts & Co. L.P, 9 West 57th Street, Suite 4200, Njujork, Njujork 10019, Sjedinjene Američke Države (u daljem tekstu: KKR).

Pretežna registrovana djelatnost privrednog subjekta United Media je emitovanje TV kanala.

U vlasništvu privrednog subjekta KKR, putem privrednog subjekta Adria Serbia BidCo d.o.o., Beograd, Republika Srbija je privredni subjekt Serbia Broadband – Srpske kablovske mreže d.o.o. Bulevar, Zorana Đinđića 8a, Beograd, Republika Srbija koji je registrovan u Agenciji za privredne registre Republike Srbije pod matičnim brojem 17280554 (u daljem tekstu: SBB).

Pretežne registrovane djelatnosti privrednog subjekta KKR je tržište kapitala za kompanije. U Bosni i Hercegovini se bavi distribucijom TV programa (Sport Klub, Ultra i Cinemania kanali) putem telekomunikacionih operatera.

1.1.1. Povezani privredni subjekti privrednog subjekta KKR u Bosni i Hercegovini

Povezani privredni subjekti privrednog subjekta KKR u Bosni i Hercegovini su:

- Telemach društvo za pružanje usluga u oblasti telekomunikacija d.o.o. Sarajevo, Džemala Bijedića 216, Sarajevo
- TELEKABEL Društvo za projektiranje, izgradnju i održavanje telekomunikacijskih sistema d.o.o. Zenica, Štrosmajerova 14, Zenica,
- Total TV BH d.o.o. za telekomunikacije, Banja Luka, Ive Andrića 14, Banja Luka
- ADRIA NEWS d.o.o., Kolodvorska 12, Sarajevo
- ADRIA NEWS BH PRODUCTION d.o.o., Kolodvorska 12, Sarajevo

Podnosioci prijave su naveli da privredni subjekt KKR nema više vlasništvo nad privrednim subjektom Tarkett S.A., te indirektno nad privrednim subjektom Galerija podova d.o.o. za trgovinu Banja Luka.

1.2. Privredni subjekti Grand Slam Group - Podnosilac prijave

Privredni subjekt Grand Slam Group d.o.o., Danila Lekića 31, 11 000 Beograd, Republika Srbija, registrovan je 10.3.1996. godine u Agenciji za privredne registre Republike Srbije, pod matičnim brojem 17136224, u vlasništvu je fizičkih lica Fahrete Živojinović (JMBG: (..)), (..), Beograd i Slobodana Živojinovića (JMBG: (..)), (..), Beograd.

Pretežne registrovane djelatnosti privrednog subjekta Grand Slam Group su veleprodaja hrane, pića i duhana.

Privredni subjekt Grand Slam Group nema registrovanih privrednih subjekata u Bosni i Hercegovini.

1.3. Privredni subjekt Grand Production - ciljano društvo

Privredni subjekt Produkcijaska i izdavačka kuća Grand Production, Danila Lekića 31, 11 000 Beograd, Republika Srbija je registrovan 30.10.1998. godine u Agenciji za privredne registre Republike Srbije, pod matičnim brojem 17203495.

Privredni subjekt Grand Production je pod zajedničkom kontrolom privrednih subjekata Grand Slam Group i fizičkog lica Aleksandra Popovića, (..), Novi Beograd, Beograd, Srbija (matični broj: (..)). Privredni subjekt Grand Slam Group trenutno posjeduje (..) % udjela u privrednom subjektu Grand Production dok je preostalih (..) % u vlasništvu fizičkog lica Aleksandra Popovića.

Pretežna registrovana djelatnost privrednog subjekta Grand Production je snimanje i izdavanje zvučnih zapisa i muzike, kao i emitovanje svog TV kanala pod nazivom Grand Narodna Televizija.

Privredni subjekt Grand Production je prisutan na tržištu Bosne i Hercegovine u prodaji CD i DVD (pjevača koji snimaju za privredni subjekt Grand Production).

Povezano društvo privrednog subjekta Grand Production je privredni subjekt International Health Products Co. d.o.o., Danila Lekića 31, Novi Beograd, Beograd, Republika Srbija (u daljem tekstu: IHPC).

Pretežne registrovane djelatnosti privrednog subjekta IHPC su nespecijalizovana trgovina na veliko dijetetskih proizvoda, krema i čajeva veledrogerijama.

U Bosni i Hercegovini privredni subjekt IHPC je prisutan putem izvoza svojih proizvoda individualnim kupcima.

2. Pravni okvir ocjene predmetne koncentracije

Konkurencijsko vijeće u postupku ocjene predmetne koncentracije primijenilo je odredbe Zakona, Odluke o utvrđivanju relevantnog tržišta («Službeni glasnik BiH», broj 18/06 i 34/10), te Odluke o načinu podnošenja prijave i kriterijima za ocjenu koncentracija privrednih subjekata («Službeni glasnik BiH», broj 34/10).

Konkurencijsko vijeće, u skladu sa članom 43. stav (7) Zakona, pri izračunu ukupnih godišnjih prihoda učesnika koncentracije je koristilo kriterije i standarde Obavijesti Evropske komisije o izračunu ukupnog prihoda u skladu sa Uredbom Vijeća (EEZ) broj: 4064/89 o kontroli koncentracije privrednih subjekata.

3. Pravni osnov i oblik koncentracije

Pravni osnov predmetne koncentracije predstavlja Memorandum o razumijevanju koji je zaključen 14. 2.2014. godine između privrednog subjekta SBB (kupac) i privrednog subjekta Grand Slam Group i fizičkog lica Aleksandra Popovića (prodavac).

Memorandum o razumijevanju sadrži ozbiljnu namjeru potpisnika da zaključe ugovor o kupoprodaji u vezi sa prodajom (..) % udjela u privrednom subjektu Grand Production, na osnovu koga će privredni subjekt KKR (posredstvom svog povezanog privrednog subjekta United Media) steći kontrolu nad privrednim subjektom Grand Production.

Podnosioci prijave su dana 10.7.2014. godine dostavili Ugovor o kupoprodaji udjela koji je potpisan dana 25.4.2014. godine između privrednog subjekta Grand Slam Group, te fizičkog lica Aleksandra Popovića kao prodavaca, privrednog subjekta United Media kao kupca, te fizičkih lica Slobodana i Fahrete Živojinović.

Nakon provođenja predmetne koncentracije privredni subjekt KKR će imati (..) % vlasničkih udjela, privredni subjekt Grand Slam Group (..) % i fizičko lice Aleksandar Popović (..) % vlasničkih udjela.

U skladu sa članom 12. stav (1) tačka b) Zakona pravni oblik koncentracije predstavlja sticanje kontrole ili dominantnog uticaja jednog privrednog subjekta (privredni subjekt United Media) nad drugim privrednim subjektom (privredni subjekt Grand Production), kupovinom većine dionica.

4. Relevantno tržište učesnika koncentracije

Relevantno tržište, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda (usluga) koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta, relevantno tržište proizvoda obuhvata sve proizvode i/ili usluge koje potrošači smatraju međusobno zamjenjivim s obzirom na njihove bitne karakteristike, kvalitet, namjenu, cijenu ili način upotrebe.

Prema članu 5. Odluke o utvrđivanju relevantnog tržišta relevantno tržište u geografskom smislu obuhvata cijelu ili dio teritorije Bosne i Hercegovine, na kojoj su tržišni konkurenti aktivni u prodaji i/ili kupovini relevantnog proizvoda pod jednakim ili dovoljno ujednačenim uslovima koje to tržište bitno razlikuje od uslova tržišne konkurencije na susjednim geografskim tržištima.

Obzirom na navedeno, a na osnovu utvrđene pretežne registrovane djelatnosti privrednog subjekta Grand Production Konkurencijsko vijeće je utvrdilo da je relevantno tržište proizvoda/usluga predmetne koncentracije tržište muzičkog izdavaštva i snimanja zvuka.

Relevantnim tržištem u geografskom smislu smatra se tržište Bosne i Hercegovine obzirom da učesnici koncentracije svoje prihode, između ostalog, ostvaruju prodajom CD i DVD te nastupima pjevača „Zvjezde Granda“ na bosanskohercegovačkom tržištu.

Slijedom gore navedenog, relevantnim tržištem predmetne koncentracije smatra se tržište muzičkog izdavaštva i snimanja zvuka na području Bosne i Hercegovine.

5. Obaveza prijave koncentracije

Obaveza prijave koncentracije privrednih subjekata, u smislu člana 14. stav (1) tačke a) i b) Zakona, postoji ako ukupni godišnji prihodi učesnika koncentracije ostvareni prodajom roba i/ili usluga na svjetskom nivou iznose 100.000.000,00 KM, po završnom računu u godini koja je prethodila predmetnoj koncentraciji, i da ukupan prihod svakog od najmanje dva privredna subjekta, učesnika koncentracije ostvaren prodajom roba i/ili usluga na tržištu Bosne i Hercegovine, iznosi najmanje 8.000.000,00 KM, ili ako je zajednički tržišni udio učesnika koncentracije na relevantnom tržištu veći od 40,0%.

Ukupni godišnji prihodi privrednih subjekata učesnika koncentracije (i njihovih povezanih privrednih subjekata), na dan 31. decembar 2013. godine:

Tabela 1.

| | Grand Slam Group | | Grand Production | | IHPC | |
|---------------------|------------------|------|------------------|------|------|------|
| | EUR | KM | EUR | KM | EUR | KM |
| Svijet | (..) | (..) | (..) | (..) | (..) | (..) |
| Bosna i Hercegovina | (..) | (..) | (..) | (..) | (..) | (..) |

Izvor: Podaci iz prijave *Prihod je ostvaren prodajom CD i DVD i nastupa pjevača „Zvjezde Granda“ na tržištu Bosne i Hercegovine

Tabela 2.

| | KKR | |
|---------------------|------|-------|
| | EUR | KM |
| Svijet | (..) | (..) |
| Bosna i Hercegovina | (..) | (..)* |

Izvor: podaci iz Prijave *prihod obuhvata prihode svih povezanih društava privrednog subjekta KKR

Tabela 3.

| | SBB | |
|--------|------|------|
| | RSD | KM |
| Svijet | (..) | (..) |

Izvor: Podaci iz prijave

Privredni subjekt United Media nema ostvrenih prihoda u 2013. godini (osnovan u 2014. godini).

Godišnji prihod učesnika koncentracije predstavlja ukupan prihod (bez poreza na dodatu vrijednost i drugih poreza koji se direktno odnose na učesnike koncentracije na tržištu Bosne i Hercegovine), u smislu člana 9. tačka h) Odluke o načinu podnošenja prijave i kriterija za ocjenu koncentracija privrednih subjekata.

Konkurencijsko vijeće je utvrdilo (Tabele 1.-3.) da su učesnici predmetne koncentracije ispunili uslov ukupnog godišnjeg prihoda na svjetskom tržištu, u smislu člana 14. stav (1) tačka a) Zakona, ali nisu ispunili uslov ukupnog godišnjeg prihoda na tržištu Bosne i Hercegovine, u smislu člana 14. stav (1) tačka b) Zakona, jer ukupan prihod privrednog subjekta Grand Production ostvaren prodajom roba i/ili usluga na tržištu Bosne i Hercegovine iznosi manje od 8.000.000,00 KM (Tabela 1).

Također, privredni subjekt Grand Production na tržištu Bosne i Hercegovine je ostvario isključivo prodajom CD i DVD te nastupima pjevača „Zvijezde Granda“.

Budući da ukupni godišnji prihod svakog od učesnika koncentracije ostvaren prodajom roba i /ili usluga na tržištu Bosne i Hercegovine iznosi manje od 8.000.000 KM u 2013. godini, te njihov zajednički tržišni udio na relevantnom tržištu nije veći od 40,0% , isti nisu bili obavezni podnijeti Prijavu.

6. Administrativna taksa

Podnosilac prijave na ovaj Zaključak, u skladu sa članom 2. tarifni broj 108. tačka c) Odluke o visini administrativnih taksi u vezi s procesnim radnjama pred Konkurencijskim vijećem («Službeni glasnik BiH», broj 30/06 i 18/11) je dužan platiti administrativnu taksu u ukupnom iznosu od 1.000,00 KM, u korist Budžeta institucija Bosne i Hercegovine.

7. Pouka o pravnom lijeku

Protiv ovog Zaključka nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objavljivanja ovog Zaključka.

Predsjednik

Gordan Raspudić